

**TEKS UCAPAN**  
**YANG HORMAT PROFESOR DATO' DR. DAING NASIR IBRAHIM**  
**NAIB CANSELOR UNIVERSITI MALAYSIA PAHANG**  
**SEMPENA**  
**MAJLIS PERASMIAN PUSAT LATIHAN EMPOWER ECER BERA**  
**PADA HARI AHAD, 11 DISEMBER 2016, PUKUL 3:00 PETANG**  
**DI BANDAR BERA, PAHANG DARUL MAKMUR**

---

**SALUTASI**

Yang Berhormat Dato' Sri Ismail Sabri Yaakob,

Menteri Kemajuan Luar Bandar dan Wilayah

merangkap Ahli Parlimen Bera;

Yang Berhormat Dato' Norol Azali Sulaiman,

Pengerusi Jawatankuasa Kesihatan, Sumber Manusia

dan Tugas-tugas Khas Negeri Pahang

merangkap Ahli Dewan Undangan Negeri Pahang kawasan Guai;

Yang Berhormat Dato' Mohd Fadil Osman,

Ahli Dewan Undangan Negeri Pahang kawasan Kemayan;

Yang Hormat Dato' Sri Jebasingam Issace John,  
Ketua Pegawai Eksekutif, Majlis Pembangunan Wilayah Ekonomi Pantai  
Timur;

Yang Hormat Dato' Razihan Adzharuddin,  
Pegawai Daerah Bera;

Tuan-tuan dan puan-puan;

Para peserta Latihan Kemahiran dan Keusahawanan Empower ECER  
Bera;

Hadirin dan hadirat yang dikasihi.

*Assalamualaikum warahmatullahi wabarakatuh,*  
Salam Sejahtera dan Salam 1Malaysia.

## **KATA PEMBUKA**

1. *Alhamdulillah*, sukalah saya merafakkan setinggi-tinggi kesyukuran ke hadrat Allah Ta'ala kerana dengan limpah rahmat, kurnia dan izin-Nya, maka saya dapat bersama-sama dengan para tetamu yang lain dalam Majlis Perasmian Pusat Latihan Empower ECER Bera pada petang ini.
  
2. Sebagai antara pengupaya utama inisiatif Empower ECER di Bera, Universiti Malaysia Pahang sesungguhnya berbesar hati kerana dapat turut serta dalam majlis pelancaran ini bersama dengan tetamu kehormat kita, Yang Berhormat Dato' Sri Ismail Sabri Yaakob, Menteri Kemajuan Luar Bandar dan Wilayah yang juga merupakan Ahli Parlimen Bera.

## **KOMITMEN UMP**

3. Yang Berhormat Dato' Sri, tuan-tuan dan puan-puan,

Dalam hubungan tersebut, UMP komited untuk terus memasyarakatkan kewujudannya sebagai sebuah Universiti Awam yang merakyat selaras dengan agenda Universiti Komuniti dalam kerangka pelaksanaan Pelan Strategik UMP 2016-2020.

4. Sejak tahun 2012 lagi, UMP telah bekerja rapat dengan Majlis Pembangunan Wilayah Ekonomi Pantai Timur (ECERDC) dalam menggerakkan pelbagai program transformasi sosioekonomi di negeri Pahang dalam kerangka inisiatif Empower ECER.
5. *Alhamdulillah*, penglibatan dua organisasi yang dinaungi Universiti ini iaitu anak syarikatnya, UMP Advanced Education Sdn Bhd dan Persatuan Wanita UMP (MATAHARI) dalam menggerakkan pelbagai inisiatif yang berkaitan bersama pihak ECERDC, termasuklah Program Latihan Kemahiran dan Keusahawanan dan Program Latihan Akademik.

6. Transformasi yang dihasratkan melalui literasi pengetahuan dan kemahiran dalam kerangka Empower ECER berupaya mengubah landskap sosiekonomi setempat secara lestari sekiranya semua program yang telah direncana dilaksanakan dengan mengambil kira keperluan sebenar kumpulan penerima manfaat yang dikenalpasti.
7. Kini, 136 penerima manfaat dari seluruh daerah Bera sedang mengikuti tujuh kursus latihan kemahiran yang praktikal dan bernilai ekonomi yang meliputi Jahitan dan Rekaan Fesyen; Tatarias Kecantikan; Dandan Rambut; Urutan Selepas Bersalin; Penyelenggaraan Automotif; Kimpalan dan Pendawaian Elektrik dan Paip.
8. Kejayaan sebahagian peserta meningkatkan tahap ekonomi mereka melalui penjanaan pendapatan sehingga RM 300 sehari membuktikan bahawa pelaburan yang memperkaya modal insan seperti Empower ECER ini adalah lebih berkesan dalam mentransformasi landskap sosioekonomi masyarakat dalam jangka masa yang panjang.

9. Justeru, saya menaruh keyakinan bahawa melalui kewujudan Pusat Latihan Empower ECER ini yang berkeupayaan menampung 100 peserta pada satu-satu masa, maka aktiviti-aktiviti latihan dan pembelajaran kepada kumpulan penerima manfaat dapat dijalankan dengan lebih mudah, cekap dan berkesan.
  
10. Sehubungan dengan itu, saya ingin mengulangi komitmen tinggi UMP untuk terus bekerjasama rapat dengan ECERDC untuk mengembangkan inisiatif Empower ECER ini kepada seramai mungkin kumpulan penerima manfaat, bukan sahaja di daerah Bera, tetapi juga di seluruh negeri Pahang dengan sokongan berterusan daripada Kerajaan Negeri dan Kerajaan Persekutuan.

## **KATA PENUTUP**

11. Yang Amat Berhormat Dato' Sri, tuan-tuan dan puan-puan,

Sebelum mengakhiri ucapan ini, saya ingin merakamkan setinggi-tinggi ucapan penghargaan kepada pihak ECERDC, khususnya kepada Ketua Pegawai Eksekutifnya, Yang Hormat Dato' Sri Jebasingam Issace John atas kepercayaan yang diberikan kepada UMP sebagai rakan kongsi inisiatif Empower ECER yang konstruktif selama ini.

12. Akhir kata, saya berdoa ke hadrat Allah Ta'ala mudah-mudahan kita semua akan terus diberikan kekuatan untuk melaksanakan tanggungjawab dan kewajipan mentransformasi sosioekonomi masyarakat melalui inisiatif Empower ECER ini.

Sekian, *wabillahi taufiq walhidayah,*

*Assalamualaikum warahmatullahi wabarakatuh.*